

Era la nova Constituziun federala stat per stabilitad statale

En tutta quietezza è ella ida en vigur da Bumaun 2000

■ (anr/gc) **Bain ils pli paucs han realisà che cun l'emprim da schaner 2000 è la nova Constituziun federala ida en vigur. Quai è il meglier mussament per la stabilitad statale ch'ella conferma.** Atgnamain è ella sullet ina actualisaziun da quella «lescha fundamentala» ch'è vegnida introducida 1848 e dapi alur revidida totalmain be duas giadas: 1874 e 1999. Bain hai dà durant pli che 150 onns enturn 140 revisiuns parzialas. Ma tut las provas da remplazzar il sa cumprovà cun insatge dal tut nov han fatg naufragi. Sco sulletta pussaivladad è restada be l'actualisaziun. Detg cun auters peds: La constituziun federala è vegnida scritta el linguatg dad oz senza perder sia substanza sa cumprovada u directiva da basa. Ils babs da questa han fatg a ses temp lavur da radent.

Basa restada, furma sa midada

La Constituziun federala da 1848 è stada l'ovra dals liberals che avevan victorisà ils conservativs 1847 e lur Lia separada. Quai è stà la davosa guerra civila en noss pajais. Alur è in stadi federativ vegnì institui. Il Parlament federal cun sias duas chombras han surpiglià l'incarica da l'antieriura dieta, almain per part, dentant en furma slargada. Era sche quai stadi è stà dirigi ditg be dals liberals è l'opposiziun conservativa vegnida integrada plaunsieu anc el 19. tschientaner

el cussegl federal. Pli che 100 onns han ils liberals gi la maiortad en quel. Ma en il decurs dal 20. tschientaner han els stuì parter vinavant la pussanza, uschia ch'igl exista dapi 40 onns la furmla magica. Questa ha integrà el guvern tuttas forzas politicas relevantas dal pajais. Quai è dapreschent: liberals, cristiandemocrats, socialdemocrats e populars. Era è questa premissa integrativa vegnida promovida tras remplazzar 1919 il sistem electoral maioritar cul proporziunal per il parlament federal.

Midar insatge vid la basa è adina stà stentus

La confederaziun ha oz ina da las pli veglias constituziuns dal mund. Entaifer 150 onns è ella vegnida revidida totalmain be duas giadas. Ins ha dentant mai vis – tant tar revisiuns totalas sco parzialas – la constituziun sco ina ovra finida. Il cuntrari: La basa constituziunala è adina vegnida considerata sco punct da partenza per ulteriuras refurmas. Talas èn vegnidas instradadas mingamai segund il basegn dal temp. En vista èn talas dapreschent pertutgant la giustia, diriger il stadi, la golvaziun da finanzas ed ils dretgs dal pievel. Ma tut pretenda bler temp e pazienza.

Per be actualisar la Constituziun federala vertenta hai duvrà pli che 30 onns. Tuttas emprovas dad ir en ina giada pli lunsch èn stadas vanas e n'han la finala

manà a nagut. Las lavurs preparativas ha la grupp da lavur Wahlen inizià (1967–1973), suandada da la grupp Furgler (1974–1977) cun ina vasta procedura da consultaziun (1978–1980) ed il rapport al cussegl federal. 1987 ha l'assemblea federala dà al cussegl federal l'incarica da reveder totalmain la constituziun cun l'actualisar e la preschentar pli chapiblamain e sistematicamain. Las refurmas per propi duain vegnir preschentadas mingamai separadamain (sco la dismessa acceptada da la clausula che mintga chantun astgia avair il medem mument be in cusseglier federal, fertant che l'artitgel pertutgant ils uestgjeus è anc adina en la constituziun, malgrà ch'ins aveva previs da l'eliminar).

Quai proceder precaut ha effectuà ch'il cussegl federal ha suttamess 1996 in messadi. Durant dus onns ha il parlament federal debattì davart questas propostas per ina Constituziun federala actualisada. Ils 18 da december 1998 è ella vegnida approvada dal parlament ed ils 18 d'avrigl 1999 dal pievel e dals chantuns. La cumpetenzza da la metter en vigur ha l'assemblea federala gi. Ella ha decidì ils 28 da settember 1999 che la nova Constituziun federala valia d'ora da Bumaun 2000. Questa è ida en vigur en tutta quietezza, confermond con solid che noss stadi federal è.



Entaifer 150 onns è la constituziun federala vegnida revidida totalmain be duas giadas.